

بِسْمِ اللَّهِ الرَّحْمَنِ الرَّحِيمِ

“আধ্যাত্মিকতার উন্নত মার্গে অধিষ্ঠিত হওয়াই মু’মিনের প্রকৃত ঈদ”

সৈয়দনা হযরত আমীরুল মুমিনীন খলীফাতুল মসীহ আল্ খামেস (আই:) কর্তৃক লন্ডনের বাইতুল ফুতুহ্ মসজিদে ২রা অক্টোবর, ২০০৮-এ প্রদত্ত ঈদুল ফিতরের খুতবার সারাংশ উপস্থাপিত হচ্ছে।

তাশাহুদ, তা’উয ও সূরা ফাতিহা পাঠের পর হযূর বলেন, আল্লাহ্ তা’লার অপার অনুগ্রহে আজ আমরা ঈদ উদযাপন করছি, যাকে ইসলামী পরিভাষায় ঈদুল ফিতর বলা হয়ে থাকে। ঈদ শব্দের শাব্দিক অর্থ হচ্ছে, এমন উৎসব যা বারবার ফিরে আসে। ইসলাম ধর্মে এ ধরনের দু’টি উৎসব রয়েছে। একটি ঈদুল ফিতর অপরটি ঈদুল আযহা। ঈদুল ফিতর রমযানের শেষে আসে যেদিন পানাহারে কোন বাঁধা থাকে না আর ঈদুল আযহা মূলতঃ কুরবানীর সাথে সম্পর্ক রাখে। হাদীসে এসেছে যে, এটি পানাহার এবং আনন্দ-উল্লাসের দিন। সচরাচর আনন্দ ও খুশীর মুহূর্তের জন্য ঈদ শব্দ ব্যবহার হয়। বছরের দু’টি ঈদ আমাদের দৃষ্টি আকর্ষণ করে বলে, তুমি খোদার নির্দেশ পালনার্থে যে ত্যাগ ও তিতিক্ষা করেছো তার ফলে আজ তোমাকে আনন্দ উদযাপনের স্বাধীনতা দেয়া হচ্ছে। তাই এই ঈদ মূলতঃ খোদার নির্দেশ এবং তাঁর সন্তুষ্টি লাভের জন্যই অনুষ্ঠিত হয়। পবিত্র কুরআনে যে প্রসঙ্গে ঈদ শব্দ ব্যবহৃত হয়েছে তা মুসলমানদের জন্য নয় বরং খৃস্টানদের বরাতে বর্ণিত হয়েছে। কুরআনে বলা হয়েছে, قَالَ عِيسَى ابْنُ مَرْيَمَ اللَّهُمَّ رَبَّنَا

أَنْزِلْ عَلَيْنَا مَائِدَةً مِنَ السَّمَاءِ تَكُونُ لَنَا عِيدًا لِأَوْلَادِنَا وَآخِرِنَا رَكْبَانَا آনযিল আলাইনা মাইদাতাম মিনাস সামায়ে তা’কুনুলানা ঈদাল্লি আউয়ালিনা ওয়া আখিরিনা} (সূরা আল মায়দা:১১৫) অর্থ: মরিয়মের পুত্র ইসা বললো, হে আল্লাহ্ আমাদের প্রভু! তুমি আকাশ হতে আমাদের জন্য খাদ্য ভরতি খাঞ্চা নাযেল করো যেন তা আমাদের প্রথমাংশ এবং শেষাংশের জন্য ঈদ স্বরূপ হয়। মুসলমানদের জন্য ঈদ শব্দ যে অর্থে ব্যবহৃত হয় এটি তাথেকে ভিন্ন অর্থ। খৃস্টানদের এই ঈদ আল্লাহ্র পক্ষ থেকে কোন কুরবানীর ফলে নাযেল হয়নি। আপনারা যদি সূরা মায়দায় বর্ণিত পুরো বিষয়টি নিয়ে চিন্তা করেন তাহলে দেখবেন যে, প্রার্থনা মোতাবেক আল্লাহ্ উভয় যুগের জন্যই রিয়্কের ব্যবস্থা করেছেন আর পাশাপাশি সাবধান করে বলেছেন, যদি তোমরা কৃতজ্ঞ না হও তাহলে শাস্তি পাবে। অদৃশ্যের বিষয়ে সম্যক জ্ঞাত আল্লাহ্ জানতেন যে, এরা এক সময় গিয়ে অকৃতজ্ঞ হবে তাই কঠোর শাস্তি সম্পর্কেও হুঁশিয়ারি প্রদান করেছেন। বর্তমানে আমরা দেখছি যে, খৃষ্ট জগত কিভাবে এই রিয়্ক অপচয় করছে বা রিয়্কের অন্যায় ব্যবহার হচ্ছে। এ কারণেই আল্লাহ্ তা’লা ভয়াবহ শাস্তির সংবাদ দিয়েছেন। সুতরাং একজন মু’মিন এমন ঈদের আকাংখা করতেই পারেন না আর আল্লাহ্ও এমন ঈদ সম্পর্কে আনন্দ-উচ্ছ্বাসের নির্দেশ দেন নি বরং এই ঈদ থেকে বাঁচার জন্য সূরা ফাতিহাতে غَيْرِ

لَا الضَّالِّينَ الْمَغْضُوبِ عَلَيْهِمْ وَلَا الضَّالِّينَ এর দোয়া শিখিয়েছেন। এই দোয়া আমরা প্রত্যেক নামাযের প্রতিটি রাকাতে পাঠ করে থাকি। মু'মিনের ঈদ হচ্ছে তা যারা ঘুরে ফিরে বারবার আসে আর আনন্দের বার্তা নিয়ে আসে। একজন মু'মিনের জন্য সত্যিকার ঈদ হচ্ছে খোদার নিয়ামতপ্রাপ্তি। আল্লাহ্ এবং তাঁর রসূলের আনুগত্যের মাধ্যমেই এই নিয়ামত লাভ হয়। আর এই আনুগত্যের ফলে হযরত মির্যা গোলাম আহমদ কাদিয়ানী (আ:) খোদার কাছ থেকে পরম পুরস্কার লাভ করেছেন। মহানবী (সা:)-এর পূর্ণ আনুগত্য ও দাসত্বের ফলে আল্লাহ্ তা'লা তাঁকে নবীর মর্যাদায় অধিষ্ঠিত করে মসীহ্ ও মাহদীরূপে পৃথিবীতে আবির্ভূত করেছেন। এর পরের পদমর্যাদাও একজন মু'মিন আল্লাহ্ এবং তাঁর রসূলের আনুগত্যের ফলেই লাভ করে। সুতরাং এই নিয়ামত একজন আহমদীকে অন্যদের তুলনায় সতন্ত্র বৈশিষ্ট্য দান করে।

আল্লাহ্ তা'লা কেবল খৃস্টানদেরকেই সতর্ক করেন নি বরং সেসব মুসলমানও এতে সম্বোধিত যারা যুগ ইমামকে অস্বীকার করেছে, কারণ তারা মনে করে, মহানবী (সা:)-এর আনুগত্য করেও নবুওতের মর্যাদা লাভ করা সম্ভব নয় অথচ আল্লাহ্ তা'লা পবিত্র কুরআনে বলেন,

وَمَنْ يُطِيعِ اللَّهَ وَالرَّسُولَ فَأُولَٰئِكَ مَعَ الَّذِينَ أَنْعَمَ اللَّهُ عَلَيْهِمْ مِنَ النَّبِيِّينَ، {ওয়া মাইইউতি'য়িল্লাহা ওয়ার্‌রাসূলা

ফাউলাইকা মা'য়াল্লাযীনা আন'য়ামাল্লাহ্ আলাইহীম মিনাল্লাবীঈনা ওয়াস্‌সিদ্দিক্বীনা ওয়াশ্‌শুহাদায়ে ওয়াছ্‌ছালেহীনা ওয়া হাসূনা উলাইকা রফীক্বা} (সূরা আন নিসা:৭০) অর্থ: এবং যারা আল্লাহ্ এবং এই রসূলের আনুগত্য করবে তারা ঐসব লোকদের অন্তর্ভুক্ত হবে যাদেরকে আল্লাহ্ পুরস্কার দিয়েছেন অর্থাৎ নবী, সিদ্দিক, শহীদ ও সালাহদের মধ্যে। এবং এরাই সঙ্গী হিসেবে উত্তম।

হযরত বলেন, খোদার জন্য ত্যাগ স্বীকার করা এবং তাঁর রসূলের পূর্ণ আনুগত্য করার পরও যারা কোনই পুরস্কার পায় না তাদের আবার ঈদ কিসের? আজ সত্যিকারের ঈদ কেবল আহমদীদের জন্যই। যারা মসীহ্ মওউদ (আ:)-কে মেনে সেসব নিয়ামতের প্রত্যাশা রাখে যা আল্লাহ্ ও তাঁর রসূলের আনুগত্যে লাভ হয়। হযরত মসীহ্ মওউদ (আ:) এর ব্যাখ্যায় বলেন, 'আমরা নামাযে এই দোয়া করি যে,

اهْدِنَا الصِّرَاطَ الْمُسْتَقِيمَ এর অর্থ হলো, আমরা আল্লাহ্ তা'লার কাছে আমাদের ঈমানের উন্নতি এবং মানব জাতির কল্যাণের জন্য চার প্রকারের নিদর্শন যা চারটি উৎকৃষ্ট পুরস্কার হিসেবে লাভের প্রত্যাশা রাখি। অর্থাৎ, নবী, সিদ্দিক, শহীদ এবং সালাহ'র উৎকর্ষতায় পৌঁছানোর আকাংখা রাখি।

তিনি (আ:) বলেন, নবীর অনুপম বৈশিষ্ট্য হলো: 'আল্লাহ্‌র কাছ থেকে এমন অদৃশ্যের জ্ঞান লাভ যা নিদর্শন স্বরূপ হয়ে থাকে।' অর্থাৎ, খোদা তা'লা অব্যাহিতভাবে তাদের সাথে বাক্যালাপ করেন। তিনি তাদেরকে ভবিষ্যতের গুপ্ত রহস্য অবহিত করবেন।

তিনি (আ:) বলেন, 'সিদ্দিকের বৈশিষ্ট্য হলো: সত্যবাদিতা ও নিষ্ঠায় তাঁর এতটা দখল থাকবে অর্থাৎ আল্লাহ্‌র কিতাবের সত্য ও গুপ্ত রহস্যাবলী সম্পর্কে তিনি এমনভাবে অবহিত হবেন যে, অলৌকিক হবার কারণে তা নিদর্শন বিবেচিত হয়। ঐশী গ্রন্থের জ্ঞান এবং গ্রন্থে বর্ণিত ভবিষ্যদ্বাণীর প্রতি তাঁর পূর্ণ ঈমানও আবশ্যিক। আল্লাহ্‌র তৌহীদের সূক্ষ্মতত্ত্ব তিনি বুঝবেন আর আনুগত্য কাকে বলে তাও তিনি জানবেন। খোদার ভালবাসার জ্ঞান তিনি রাখবেন এবং শিরক

থেকে মুক্তির উপায়ও তিনি অবগত থাকবেন। খোদার দাসত্বের স্বরূপ কি আর আন্তরিকতা ও নিষ্ঠা কাকে বলে তাও তাঁর জানা থাকবে। খোদা ভীরুতা, খোদার সম্ভ্রুতি এবং খোদার সম্ভ্রায় বিলীন হওয়া, বিশ্বস্ততা, বিনয়, দানশীলতা, আকুতি-মিনতি, দোয়া, মার্জনা, লজ্জাবোধ, আমানত রক্ষা করা, খোদার উপর ভরসা করার মত উন্নত নৈতিক গুণাবলীর স্বরূপ এবং এর বাস্তব জ্ঞান ও এর উপর তাঁকে প্রতিষ্ঠিত থাকতে হয়। এছাড়া নিজের দুর্বলতা ও অযোগ্যতার উপর যখন তাঁর দৃষ্টি পড়ে তখন তিনি ইয়্যাকানা'বুদু বলেন আর নিষ্ঠার উপর প্রতিষ্ঠিত হয়ে মিথ্যাকে পরিত্যাগ করেন, সকল প্রকার নোংরামি এবং অপবিত্রতা যা মিথ্যার সাথে সংশ্লিষ্ট তা থেকে মুক্ত থাকেন এবং কখনো মিথ্যা না বলার অঙ্গীকার করেন। এ অঙ্গীকার করেন যে, কখনো মিথ্যা সাক্ষ্য দিবেন না, প্রবৃত্তির বশবর্তী হয়ে কখনো মিথ্যা কথা বলবেন না, অযথাও মিথ্যা বলবেন না আর কোন লোভের বশবর্তী হয়েও মিথ্যা বলবেন না, কোন ক্ষতি থেকে রেহাই পাবার জন্যও মিথ্যা বলবেন না অর্থাৎ কোনভাবেই কোন ক্রমে মিথ্যার আশ্রয় নেবেন না। যদি এই অঙ্গীকারের উপর প্রতিষ্ঠিত হন তাহলে তিনি ইয়্যাকানা'বুদু'র উপর সত্যিকারেই প্রতিষ্ঠিত। এ কাজ হচ্ছে উন্নত পর্যায়ের ইবাদত আর এটিই সিদ্দিকের সংজ্ঞা।'

তিনি (আ:) আরো বলেন, 'শহীদের বৈশিষ্ট্য হলো, সমস্যা, দুঃখ-কষ্ট এবং পরীক্ষার সময় এমন ঈমানী দৃঢ়তা ও উন্নত নৈতিকতা প্রদর্শন করা যা অলৌকিক হবার কারণে নিদর্শন হয়ে থাকে। ঈমান যত দৃঢ় থাকে আমলও ততটা দৃঢ় হয়। উন্নতির সিঁড়ি বেয়ে এমন ঈমানী শক্তি এক পর্যায়ে তাঁকে শহীদের মর্যাদায় অধিষ্ঠিত করে। ঈমানের অবস্থা এমন পর্যায়ে উপনীত হলে তিনি সবকিছু কুরবানী করতে পারেন এমনকি প্রাণ বিসর্জন দিতেও দ্বিধা করেন না।'

এরপর তিনি (আ:) বলেন, 'সালেহীন বা পুণ্যবান তারা যাদের ভেতর থেকে সকল প্রকার বিশৃংখলা এবং ব্যাধি দূরীভূত হয়। মানুষ যখন আরোগ্য লাভ করে তখন যেভাবে খাবারের স্বাদ পেতে আরম্ভ করে অনুরূপভাবে পুণ্যবানদের মধ্যে কোনরূপ আধ্যাত্মিক ব্যাধি থাকে না আর ফাসাদ বা বিশৃংখলা বলতেও কিছু অবশিষ্ট থাকে না। মানুষ যখন নিজের নফস বা প্রবৃত্তিকে দমন করে তখনই এর পরাকাষ্ঠা দেখা যায়। সুতরাং সালেহ হবার জন্য আত্ম সংশোধনের চেষ্টা করা একান্ত আবশ্যিক।'

হুযূর বলেন, মসীহ মওউদ (আ:)-এর উদ্ধৃতির আলোকে আমরা কৃতজ্ঞতা প্রকাশের প্রেরণা পাই কেননা, খোদা তা'লা আপন অনুগ্রহে আজ আমাদেরকে এমন জামাতে অন্তর্ভুক্ত করেছেন যারা পবিত্র কুরআনের সঠিক জ্ঞান ও মর্মার্থ অনুধাবন করতে সক্ষম। এর পাশাপাশি আমাদের সেসব দায়িত্বের প্রতিও দৃষ্টি নিবদ্ধ হওয়া উচিত যা একজন আহমদীর কাছে কাম্য। যদি কোন মানুষ অন্ধকার কক্ষে বাস করে তাহলে সে বলতে পারে যে, আলো দেখিনি কিন্তু যার জন্য আলোর ব্যবস্থা আছে সে যদি না দেখে তাহলে এর জন্য অন্য কেউ নয় বরং সে-ই দায়ী।

হুযূর বলেন, পবিত্র রমযান মাসে আপনারা ইবাদত বন্দেগী করেছেন, পবিত্র কুরআন পাঠ করেছেন, সাধ্যমতো কুরআনের দরস শুনেছেন এবং কুরআনের শিক্ষার প্রতি অভিনিবেশেরও সুযোগ হয়েছে। মন্দ প্রবৃত্তিকে দমন করে উন্নত নৈতিক গুণাবলী অবলম্বনের চেষ্টা করেছেন। বাস্তবিকপক্ষে এসব উত্তম অভ্যাসগুলো ধরে রাখা এবং এর উপর আমলই খোদা ও তাঁর রসূলের আনুগত্য। রমযানে খোদার নির্দেশ মানতে গিয়ে সকল প্রকার বৈধ জিনিস পরিত্যাগ করা আর তাঁর ভালবাসা ও নৈকট্য লাভের বাসানায় রাত জাগার পুরস্কার স্বরূপ প্রদেয় একটি বাহ্যিক আনন্দের নাম হচ্ছে ঈদ। খোদার

খাতিরে কৃত কুরবানীর প্রতিদান স্বরূপ এই ঈদ আয়োজন। এর ধারা অফুরন্ত এবং অশেষ। ঈদের এই আনন্দ বিশ্বের কোন শক্তিই আমাদের কাছ থেকে ছিনিয়ে নিতে পারবে না। আল্লাহর জন্য কষ্ট ও সমস্যায় পতিত হলে খোদা এভাবেই তার উত্তম প্রতিদান দিয়ে থাকেন। খোদার রহমত সবকিছুকে পরিবেষ্টন করে রেখেছে। খোদা তা'লা বলেন, مَنْ جَاءَ بِالْحَسَنَةِ فَلَهُ عَشْرُ أَمْثَالِهَا وَمَنْ جَاءَ بِالسَّيِّئَةِ فَلَا يُجْزَىٰ إِلَّا مِثْلَهَا وَهُمْ لَا يُظْلَمُونَ {মান জাআ বিলহাসানাতি ফালাহু আশরু আমছালিহা ওয়া মান জাআ বিস্সাইয়িয়াআতি

ফালা ইউজ্যা ইল্লা মিছলাহা ওয়া হুম লা ইউয়লামুন} (সূরা আল্ আন'আম:১৬১) অর্থ: 'যে কেউ সৎকর্ম করবে সে এর জন্য দশগুণ পুরস্কার পাবে এবং যে কেউ মন্দ কর্ম করবে তাকে কেবল তার অনুরূপ প্রতিফল দেয়া হবে, এবং তাদের উপর কোন অবিচার করা হবে না।'

হুযূর বলেন, ইনি হলেন আমাদের খোদা যিনি সর্বদা তাঁর বান্দাদেরকে আপন অনুগ্রহে ভূষিত করেন। তিনি তাঁর বান্দার প্রতি বড়ই দয়ালু। তিনি বান্দার প্রতিটি তুচ্ছাতুচ্ছ কর্মেরও প্রতিদান দেন আর পুণ্য কর্মের পুরস্কারতো কয়েক গুণ বাড়িয়ে দিয়ে থাকেন। আমরা রমযানে তাঁর নির্দেশ মেনে ত্রিশটি রোযা রেখেছি হাদীস অনুসারে এরফলে তিন'শ দিনের সওয়াব দিবেন আর যারা শওয়ালের ছয় রোযা রাখবেন তাদেরকে ছত্রিশ দিনের হিসেবে পুরো বছরের রোযা রাখার সওয়াব দিবেন। ইনি আমাদের খোদা যিনি বান্দার কাছে কোন ত্যাগ চাইলে তার প্রতিদান কয়েকগুণ বাড়িয়ে দেন। ত্রিশ দিন রোযার শেষে আমাদেরকে ঈদ দিয়েছেন আর এদিনে পানাহার ও আনন্দ-উচ্ছ্বাস করার সুযোগ দিয়েছেন। ঈদের দিনে আনন্দ করার পাশাপাশি আমাদের খোদার প্রতি কৃতজ্ঞতা প্রকাশ করাও আবশ্যিক আর ঈদের নামায় হচ্ছে কৃতজ্ঞতা প্রকাশের প্রথম ধাপ। তিনি যদি আমাদেরকে কষ্টে নিপতিত করেন তাহলে এর বিনিময়ে উত্তম প্রতিদানও দেন। খোদার জন্য কেউ ত্যাগ স্বীকার করলে খোদা স্বয়ং তার জন্য স্বাচ্ছন্দের বিধান করেন। ধর্মের খাতিরে কৃত কোন ত্যাগই প্রতিদান বিহীন থাকে না। আমরা যুগ মসীহকে মেনেছি আর তাঁকে মানার কারণে অন্যদের রোষানলে পড়ে ধন-সম্পদ, মান-ইজ্জত, প্রাণ ও সন্তান-সন্ততির কুরবানী করছি। আমাদের এই কুরবানী বৃথা যাবে না। আল্লাহ তা'লা বলেন,

إِنَّ مَعَ الْعُسْرِ يُسْرًا فَإِنَّ مَعَ الْعُسْرِ يُسْرًا {ইল্লা মা'য়াল্ উসরে ইউসরা। ফাইল্লা মা'য়াল্ উসরে ইউসরা} (সূরা আল্ ইনশেরাহ:৬-৭) অর্থ: নিশ্চয় কষ্ট-কাঠিন্যের সাথে সহজসাধ্যতা রয়েছে। হ্যাঁ অবশ্যই কষ্ট-কাঠিন্যের সাথে সহজসাধ্যতা রয়েছে। এ আয়াত আমাদেরকে সংবাদ দিচ্ছে যে, তোমাদের এই দু:খ-দুর্দশার সময় স্থায়ী নয় বরং এরপরে তোমাদের জন্য খোদার পক্ষ থেকে স্বাচ্ছন্দের বিধান হবে এবং তোমরা খোদার অশেষ দানে ভূষিত হবে। আল্লাহর দানের ধারা অনন্ত। যারা অ-আহমদী তারা নবী, সিদ্দিক, শহীদ ও সালেহ হতে পারে বলে বিশ্বাস করে না। তারা খোদার অনন্ত নিয়ামতের দ্বার রুদ্ধ করে দিতে চায়। এরা কখনো নাসেখ-মনসূখ আবার কখনো ঈসার মৃত্যু নিয়ে সন্দেহ পোষণ ছাড়াও অন্যান্য বিতন্ডায় লিপ্ত। পীর পূজা করে। এরা প্রয়োজনে মিথা বলা বৈধ মনে করে; তাদের সিদ্ধিকিয়াতের সাথে কি সম্পর্ক আর তাদের সত্যবাদী হবার প্রয়োজনই বা-কি? যারা অন্যকে হত্যা করা পুণ্যের কাজ বলে মনে করে আর অত্যাচারীর হাতকে শক্তিশালী করে

তারা কিভাবে ঈমানে উন্নতি করতে পারে। আমাদের প্রিয় নবী (সা:) তাঁর বিদায় হজ্জের ভাষণে বলেছেন, ‘মানুষের প্রাণ, সম্পদ ও সম্মানকে পদদলিত করা কোন ভাবেই বৈধ নয়’। অথচ আজ এরা খোদা এবং সেই অসীম দয়ালু নবীর নামে জঘন্য অপকর্ম করছে। ধর্মের নামে অন্যায়ভাবে অন্যের অধিকার খর্ব করাই এদের কাজ। আবার নিজেদের সংগঠনের নাম রাখে ‘তাহাফ্‌ফুজে খতমে নবুয়ত’। নবীর ধর্মের সেবক হবার দাবী করে, অন্যদের আত্মঘাতি আক্রমণে প্ররোচিত করে কিন্তু নিজেদের প্রাণের আশংকা আছে জানলে এরা লেজ গুটিয়ে পালায়। যে নবীর সম্মান রক্ষার জন্য এরা আন্দোলন করছে সেই নবীর পদাঙ্ক অনুসরণে খোদা যে নিয়ামতরাজির পথ খোলা রেখেছেন এরা নিয়ামতের সেই দ্বার রুদ্ধ করে দিতে কুঠা বোধ করে না। মোটকথা সকল প্রকার আধ্যাত্মিক ব্যাধিতে এরা আক্রান্ত। এরা সিদ্ধিকও নয় এরা শহীদও হয়নি এবং সালেহ্ বা সৎকর্মশীলও হতে পারবে না আর নবুওতকেতো পূর্বেই অস্বীকার করে বসে আছে। খোদার নিয়ামতের দরজা তারা নিজেদের জন্য চিররুদ্ধ করে রেখেছে। সুতরাং আজ আমরা মুহাম্মদী মসীহর অনুসারীরা যদি নিজেদের মধ্যে একটি আধ্যাত্মিক পরিবর্তন এনে এই অনন্ত নিয়ামতের উত্তরাধিকারী হতে পারি তাহলে আমরাই সত্যিকার ঈদ উদযাপন করতে পারবো। এ জন্য একজন আহমদীর সদা সচেষ্টি থাকা বাঞ্ছনীয়। আজ যুগ মসীহকে মানার জন্যই আমাদেরকে কষ্ট দেয়া, হত্যা করা বা শহীদ করা হয়। আমাদের অপরাধ শুধু এটুকু যে, আমরা বলি খোদার নিয়ামতের ধারা বন্ধ হয়নি। যদি কেউ সত্যিকারেই খোদা ও রসূলের আনুগত্য করে তাদের ভালবাসায় বিলীন হয় তাহলে আধ্যাত্মিক জগতের সর্বোচ্চ পুরস্কার নবুওয়ত পর্যন্তলাভ করতে পারে। হযরত মসীহ মওউদ (আ:)-কে আল্লাহ্ তা’লা জানিয়ে রেখেছিলেন যে, কষ্ট-ক্লেশের পর স্বাচ্ছন্দের দিন আসবে আর অস্বীকারকারীরা লাঞ্ছিত হবে। তাদের কোন ষড়যন্ত্র বা আঁতাত খোদার সিংহের উন্নতির পথে অন্তরায় সৃষ্টি করতে পারবে না। আল্লাহ্ তা’লা আরবী ভাষায় তাঁর প্রতি ইলহাম করেছেন: **بعد العسر يسرا** {বা’দাল উসরে ইউসরা} অর্থ: ‘এই সহজসাধ্য বা স্বাচ্ছন্দের অবস্থা তোমার জামাতের জন্য নির্ধারিত, এটি অবশ্যই আসবে।’ এটি কোন সাধারণ বিষয় নয় বরং এর পিছনে মহান এক বিজয়ের সুসংবাদ রয়েছে। বিভিন্ন সময় জামাতের নিষ্ঠাবান সদস্যরা শাহাদাতের পেয়ালা পান করেছেন। দু’বছর পূর্বে ফজরের নামাযের সময় মন্ডি বাহাউদ্দীনে আটজন ধর্মপ্রাণ আহমদীকে শহীদ করা হয়। এবছর রমযানেও দু’জন নিষ্ঠাবান যুবক এবং একজন বর্ষিয়ান আহমদীকে শহীদ করে এরা আহমদীয়াতের অগ্রযাত্রাকে প্রতিহত করার অলীক স্বপ্ন দেখে। খোদার খাতিরে যারা পূর্বেই প্রাণ বিসর্জন দিতে প্রস্তুত এরা কি করে তাদেরকে দমিয়ে রাখতে পারে। কখনো নয়, কখনো নয়। শত্রু আমাদের কাছ থেকে রমযান ও ঈদের আনন্দ কেঁড়ে নেয়ার ফন্দি করেছিল কিন্তু তারা জানে না তাদের এরূপ ঘৃণ্য অপকর্মের ফলে রমযানের আশিস থেকে আমরা আরো বেশি কল্যাণমন্ডিত হয়েছি। যারা নিরীহ আহমদীদের হত্যা করছে, সরকার বা সরকারের বিভিন্ন সংস্থা মোল্লাদের প্ররোচনায় পড়ে তাদের ধরার পরিবর্তে মহনাবী (সা:)-এর সম্মানহানীর মিথ্যা অপবাদ আরোপ করে নিষ্পাপ আহমদীদেরকে জেলে পুরছে। এটি আমাদের জন্য একান্ত কষ্টদায়ক কেননা মুহাম্মদ (সা:)-এর বংশের প্রতিও যদি কোন

অপবাদ লাগানো হয় তাহলেও আমরা প্রচণ্ড দুঃখ ভারাক্রান্ত হয়ে পড়ি। হে আহমদী বিরোধী অজ্ঞরা! একটু বিবেক খাটাও, তোমরা কি বলছো আর কি করছো। মনে রেখো নিরীহ আহমদীদের বিরুদ্ধে প্রতিশোধ গ্রহণ করার জন্য খোদা আছেন। যদি তোমরা এই অন্যায় অবিচার ও নিষ্পেষণ থেকে বিরত না হও তাহলে খোদার কঠোর হস্ত তোমাদেরকে ধ্বংস করবেন। আমাদের খোদা সর্বদা আমাদেরকে এই সুসংবাদ দিচ্ছেন যে, যেভাবে রোযার কুরবানী তোমাদের জন্য ঈদরূপী আনন্দের বার্তা নিয়ে এসেছে অনুরূপভাবে আহমদীদের কুরবানী মহা আনন্দের বার্তা বহন করবে।

সুতরাং আজ শান্তি ও সৌহার্দের পথ সুগম করার দায়িত্ব আহমদীদের। সেদিন সমাগত যখন শহীদের প্রতিটি রক্ত বিন্দু তোমাদেরকে বলবে, ‘দেখো! আমার রক্ত বৃথা গেছে কি?’ শহীদের সন্তান, বিধবা স্ত্রী, পিতা-মাতা এবং ভাই-বোন অতি আনন্দের সাথে বলবে যে, ‘দেখো! আমাদের পিতা, স্বামী, সন্তান বা ভাই যে কুরবানী করেছেন, যে ত্যাগ স্বীকার করেছেন তা এই প্রভাতের তুলনায় বেশি উজ্জ্বল এবং বেশি জগমগ করছে। আজ আমরা সেই ঈদ দেখছি যে ঈদের জন্য প্রজন্মের পর প্রজন্ম ত্যাগ স্বীকার করে। সেই প্রভাত যখন উদিত হবে তখন হযরত মসীহ মওউদ (আঃ)-এর সাথে কৃত খোদার এই প্রতিশ্রুতি **العید الاخر تنال منه فتحا عظيما** {আল্ ঈদুল আখার তানালা মিনছ ফাতহান আযীমা} অর্থ: আরো একটি ঈদ রয়েছে যা তোমার বিজয়কালে আসবে’ এ ইলহাম অত্যন্ত মহিমার সাথে পূর্ণ হবে। তখন প্রত্যেক আহমদী আবাল-বৃদ্ধ-বণিতা এই ঈদকে স্বাগত জানাবে। প্রকৃতপক্ষে এই ঈদই আহমদীদের চূড়ান্ত উদ্দেশ্য।’ সবশেষে হযূর ঈদের নামাযে উপস্থিত সকল আহমদী এবং এমটিএ’র মাধ্যমে বিশ্বের সকল আহমদীকে ঈদ মোবারক জানান। হযূর বলেন, এই ঈদ আহমদীয়া খিলাফতের দ্বিতীয় শতাব্দীর প্রথম ঈদ। আল্লাহ্ করণ সত্বর খোদা তা’লা আমাদেরকে চূড়ান্ত ঈদ উদ্‌যাপনের তৌফিক দিন। জামাতের সকল কর্মী, আহমদীয়াতের খাতিরে যারা কারাভোগ করছেন, সকল ওয়াফফে নও এবং ওয়াকফে যিন্দেগীকে আপনারা দোয়ায় স্মরণ রাখুন। আসুন আমরা সবাই মিলে দোয়া করি।

(প্রাপ্ত সূত্র: কেন্দ্রীয় বাংলা ডেস্ক, লন্ডন)